

110年東門國小校內語文競賽客家語朗讀文章（四縣腔）

編號 1 號

【避暑】葉美伶原作

鳳凰樹榮榮，細細蕊个靚花開到鬧熱煎煎仔，日頭緊來緊烈，企在樹下看往上，日頭絲仔晟到人擘目毋開，不時還聽得著樹頂蟬仔，知了¹～知了～知了～，放勢牯唱等這時節正會有个歌曲。

逐年這央時係最暢个時節！等學期結束、放寮該下，阿爸會送轉莊下同講客个阿公、阿婆培養感情。歇在莊下無冷氣，毋過，闊闊个瓦屋當涼，若係暗晡頭還會熱个時節，阿婆就會擎一支扇仔摺撥涼，撥啊撥欸毋多知仔就牽覺咧。老屋面前有一隻盡闊个禾埕，阿婆講這位頭擺係晒穀用个，今這下穀都直接載去農會焙咁，毋使日頭晒，也毋驚下晝頭个風馳雨。阿婆講著頭擺艱苦个日仔，成時還會偷偷仔掙目汁。這下禾埕既經變成停車坪咁，毋過下把仔²還係晒蘿蔔乾、晒鹹菜乾个好所在，也係兜細人仔个遊樂場。

阿公个屋面前有一頭蓮霧樹總係打到結結，一樹仔个蓮霧纜

纜吊吊。逐年到這時節就像係同講：「歡迎光臨，煞猛打子等你來，就像阿公、阿婆心肝肚園等恁恁个愛，望等子孫轉來共樣哦！」屋頭前還有一條圳溝，歸日仔泉水流流流流，到這下都還有蝦公好捉。阿婆講，就算係天早也毋怕，泉水分个恩情恁愛知好惜。在烈烈个日頭下，最清涼个享受就係去洒水仔、覓蜆仔、捉蝦公，還過去戽水、捉魚仔。禾割忒，在田坵肚煨番薯、搞騎馬打戰、搞扮家啦仔，這兜全部都分兜細人仔搞到歡喜靈天，也就係避暑个快樂生活。

一日，讀小學三年生咁，阿姆安排在避暑去補習。逐日關在冷氣間肚，完個人³就像擲個弓，害吾身材變到又高又瘦，人也變到又還較白淨。歸日仔像極樂仔樣仔挨無停，想有阿公、阿婆个莊下哩！想等，該恁多蓮霧還等等去摘；想等，鄰舍个細人伴仔還等去共下搞園人尋……。

阿爸講，恁客家人盡重要个兩件事情：讀書摺耕種。人講「晴耕雨讀」，故所，愛出頭天，讀書第一重要。好得，阿爸不時還會擲工載兜轉去看阿公、阿婆。其實，盡捨毋得个係無法度逐日聽著阿公、阿婆講好聽个古，還過瓦屋禾埕坪、老老嫩嫩好聽个客家話。

（選自 110 年全國語文競賽文章）

¹ 知了：音 di' lio'；知道了。

² 下把仔：音 ha ba' e'；有時候。

³ 完個人：音 von' ge ngin'；整個人。



110年東門國小校內語文競賽客家語朗讀文章（四縣腔）

編號 2 號

【鬧熱个落雨天】曾菁怡原作

鬧鐘仔鈴、鈴、鈴¹響哩！大嫲聲喊 遽遽跣床，再過忍床就會赴毋掣去學校讀書哩啲。目西西仔伸手去揪忒鬧鐘，又過橫落眠床，捨毋得摻佢分開。欸！毋係天光咁？外背仰會還係暗摸胥疏？探頭看往出，原來係天公派烏雲來通知 兜——愛落雨哩！

有人認為落雨天係麻煩天，出外愛著水衣仔，無就摯遮仔，一無細義衫褲又會涿到濕漉漉仔，愛去哪仔都毋方便。學生仔盡惱無法度出去打球仔、搞寮，一下課就會分先生掌等，麼人都做毋得出去涿雨，故所見看啊著落雨，大家就唉唉唧唧，眼盯盯仔看等雨水號等歸隻个運動坪，實在還慍悴哦！

毋過，落雨天對 來講顛倒係異鬧熱个日仔。朝晨頭一出門，滿街路都係淦淦个車仔，這片嘩嘩、該位叭叭，像久見个朋友相借問樣仔，大家相賽尖共下講起恁久無看著个思念。該兜行路个人，摯等一支支个遮仔花，分雨水淋啊過，跔等就開出各色个花彩，揆去揆轉像在該比看麼人个花較靚樣仔。你係同佢聽較

¹ 鈴：音 liang；擬聲詞。模擬鈴聲。

真兜仔，該雨水打在車仔頂、屋頂、水窟仔還過樹葉仔頂高个聲，全部都無共樣，有高音、有低音，有大聲、有細聲，像係在該唱歌仔分你聽樣仔。成時，雷公還會用 燼來打燈光，用響雷公來和聲，恁樣講起來，係毋係異生趣？

盡好在落雨天打早就去學校，因為該兜平常時囡核核个蠓螺仔²、蟻公全部都會趟出來搞水。學校个圖牆³係紅毛泥作个，壁項生个溜苔青里里仔，落雨該下，蠓螺仔趟上趟下陣打陣，相賽看麼儕蹶較遽，有个彎來幹起做起畫圖个藝術家，有个停跔在圖牆頂高享受分雨涿个清涼、逍遙、還過自在。

落雨天出來搞寮个蟻公盡好膽，衫褲無著就緊拚拚仔走出來搞水，溝壩肚朗朗滾个水流緊沖等來佢也毋驚。有幾下尾蟻公分水沖啊去還會搖來擺去，暢到奈毋得。有个蟻公大摯摯仔趟到路項來，較砸身个還做得趟轉去；較媿个將就橫在路徑頭，分天公做主哩！

鬧熱个落雨天，有人懊惱，有人歡喜，天公無法度合每一儕人个意，恁就愛自家改變想法，不管麼个天都係盡好个天。

（選自 110 年全國語文競賽文章）



² 蠓螺仔：音 seˋ loˋ eˋ；蝸牛。

³ 圖牆：音 tuˋ x iongˋ；圍牆。